

Siunnersuut: Inatsisartut Naalakkersuisullu pillugit Inatsisartut inatsisaata allanngortinneranik Inatsisartut inatsisaat nr. x, xx. Xxx 2013-imeersoq.
(Qarasaasiaq atorlugu tamanut saqqummiisarneq)

Saqqummiussissut

(Naalakkersuisut Siulittaasuat aamma Nunanut Allanut tunngasunut Naalakkersuisoq)

Inatsisartut Naalakkersuisullu pillugit Inatsisartut inatsisaata allanngortinneqarnissaanik siunnersuut Naalakkersuisut matumuuna saqqummiuppaat. Matumani pineqarpoq aalajangersakkamik ataatsimik allanngortitsineq, § 31, taassuma inatsisartut inatsisaannik, Namminersorlutik Oqartussat nalunaarutaannik aammalu kommuunit malittarisassiaannik tamanut saqqummiisarneq sammivaa. Allanngortitsineq annikippoq, kisiannili nunatsinni inatsisiliat atuussinnaanerinut aalajangersagaq taanna annertuumik isumaqarpoq.

Tamanut saqqummiisarnerup taamaallaat inatsisilianik nutaanik innuttaasunut nalinginnaasumik paasisutissiisarneq piinnanngilaa. Tamanut saqqummiisarneq periusiuvoq pinngitsoorani malittarisassallu malillugit pisartussaq, tamannalu naammassineqartassaaq maleruagassiat innuttaasunut atortuutinniarneqassagaangata. Periuseq tamanna aatsaat malinneqaraangat, oqartussaasut isumaqarsinnaalissapput, innuttaasut malittarisassat nutaat pillugit ilisimasaqalernissaminut periarfissinneqarsimanissaat. Periuseq iluatsinngitsoorpat eqqartuussiviup nalilersinnaavaa, maleruagassiat pineqartut innuttaasut pisussaaffiginngikkaat ilisimassallugit malissallugillu.

Taamaattumik pingaaruteqarpoq, tamanut saqqummiisarneq pillugu periuseq tamatigit inatsisini eqqortumik allassimasarnissaa. Ullutsinni tamanut saqqummiisarneq qarasaasiat atorlugit nittartakkatigit pisartillugit, pissusissamisuuksaaq Naalakkersuisut tamanut saqqummiisarnermut malittarisassat nutartertuarnissaannut piginnaatinneqassappata. Ullumikkut inatsisip piginnaatitsineq tamanna amigaatigaa, taamaattumillu Naalakkersuisut inatsisiliortoq pisarissortassavaat, innuttaasunut paasisutissiat internet aqutigalugu nittartakkamut allamut nuunnissaat pisariaqaleraangat.

Naalakkersuisut aammattaaq kissaatigivaat tamanut saqqummiisarnermut annertunerusumik piunasaqaatinik aalajangersaanissamut periarfissinneqarnissaaq. Assersuutigalugu suli piunasaqaatigineqartariaqarpoq innuttaasut tamanut saqqummiinerup ullua pillugu ilisimatinneqartarnissaat, aammalu pisariaqalersinnaavoq, tamanut saqqummiinerit teknikkikkut immikkut sillimaniarnermut atortut atorlugit isumannaarneqartarnissaat.

Inatsisissap atuutilerfia ilutigalugu siunertaavoq Naalakkersuisut nalunaarummik atulersitsi-

nissaat. Taamaaliornikkut maannamut aaqqiinerugallartoq iluarsineqassaaq, maannamut nittartakkap pisortatigoortumik tamanut saqqummiisarfiup ”nanoq.gl”-p ingerlaannartumik saaffiginninneq nalinginnaasumik atorneqartartumut ”naalakkersuisut.gl”-imut ingerlatittarmagu. Innuttaasut taamaattumik tamanut saqqummiisarneq pillugu maleruagassiap atuisarnerullu akornanni ataqatigiinneruneq malugissavaat, taamaasilluni toqqissisimanerulersissallugit, inatsisitigut maleruagassamik pisortatigoortumik saqqummiunneqarsimasumik ujaasigaangata.

Taamatut oqaaseqarlunga innersuussutigissavara Inatsisartuni oqaluuserisassap suliarineqarnissaa.